



Акафист

собору Иваново-Вознесенских

СВЯТЫХ

Кондак 1

Избранныи от Бога святии сродницы наши, в мире пожившии, обаче от мира не сущии, яко в предстательствах ваших надежду имуще спасения, благодарственная приносим пения и хваления, недостойнии соотечественницы ваши, вы же яко стяжавшии отечество вечное, от всяких нас бед свободите, зовущих:

Радуйтеся, вси святии земли Ивановския, приснии о нас к Богу молитвенницы.

Икос 1

Ангелом соревнителие и человеком наставницы в мире явистесе, святии сродницы наши, от древних родов даже до дней последних многоразличными подвиги Бога прославившии. Мы же пресветлый собор ваш купно и коегождо по имени хваляще, сице зовем:

Радуйся, Тихоне преподобне, Лухскую пустыню нищетою твоею обогативый;

Радуйся, мощи твоя, яко сокровище некрадомо под спудом сокровенное, обители твоей оставивый.

Радуйтесь, Фаддее и Герасиме, ученицы и спостницы Тихоновы;

Радуйтесь, смиренномудрия и трудолюбия его подражателие.

Радуйся, Макарие пустыннолюбне, на реце Лусе уединенно подвизавыйся;

Радуйся, zde первую твою обитель основавый.

Радуйся, Иоакиме, наставнику твоему Иринарху Ростовскому в подвизех поревновавый;

Радуйся, затворниче и иконописче благодатный, Николо-Шартомский монастырь возродивый.

Радуйтесь, вси святии земли Ивановския, приснии о нас к Богу молитвенницы.

Кондак 2

Видя сердцеведец Господь залог смирения вашего, и веру со упованием, и труд любве, и

ревность о славе Его, благодатию Духа Святаго неизреченно обогати вас, в том же Дусе и нас земнородных молитвы приемлете, любовьию поющих о вас: Аллилуиа.

Икос 2

Разум кичливый и мудрование плоти отвергше, святителие богомудрии, Духа елей в сосудех сердца стяжали есте, яко да просветится свет ваш пред человеки, темже и мы, недостойная чада ваша, с веселием вопием:

Радуйся, Митрофане, святителю Воронежский, земли нашея благое прозябение;

Радуйся, пастырю трудолюбный, начаток иноческаго жития зде положивый.

Радуйся, Августине, первый архипастырю града Иванова, святым патриархом поставленный;

Радуйся, народом Божиим возлюбленный и жертво Богу благоуханная.

Радуйся, Василие, похвало Кинешемская и Русския Церкви украшение;

Радуйся, исповедниче, безбожная уста заградивый златоплетением словес твоих.

Радуйся, Борисе, чрез единое токмо лето в чине епископством послуживый;

Радуйся, яко иерарх и яко мученик сугубую благодать приемый молитися о пастве твоей.

Радуйтеся, вси святии земли Ивановския, приснии о нас к Богу молитвенницы.

Кондак 3

Силою свыше облекостесь светло, святии, овому бо дар пророчества, овому же исцеления, иному слово мудрости, иному же дерзновение мученическое тем же Духом дадесе, да во всех прославляется Бог един, в Троице воспеваемый: Аллилуиа.

Икос 3

Имуще дерзновение много, яко утверждени на камени веры, мученицы крепкодушнии, иже со святителем Августином сопричтены быти сподобльшиися, некрепкаго врага победили есте силою крестною, примите от нас похвалы сицевыя:

Радуйся, Борисе, верный диаконе, во изгнании архиерею твоему послуживый;

Радуйся, нуждею от пастыря разлученный и в заключении гладом скончавыйся.

Радуйтесь, Иоанникие и Нифонте, пощением страсти первее умертвившии, страдальчески второе смерть приимшии;

Радуйся, мучениче Александре благородне, свободу духа во Христе стяжавый.

Радуйся, Иоанне протопресвитере, честную старость твою мученическим венцем увенчавый;

Радуйтесь, Алексие и Николае, на небеси со ангелы славящии Бога.

Радуйтесь, Апполоне и Михаиле, во храме славы нерукотвореннем вселившиися;

Радуйтесь, Феоктисто, Анно и Ольго, в женстем естестве мужескую твердость показавшыя.

Радуйтесь, вси святии земли Ивановския, приснии о нас к Богу молитвенницы.

Кондак 4

Бурею злобы богоборцы смущаеми бывше, тщахуся паки распяти Христа, пастырей церкви и верных в темницы влекуще и убивающе. Вы же, страдальцы святии, свидетельство миру

явистеся, яко воскресе Христос, поюще Ему:
Аллилуиа.

Икос 4

Слышавше жителие града Шуи о разорении храмов божиих, предсташа заутра окрест церкви соборныя, во еже не предати святыни на поругание, аще и увещаеми быша от пастыря злу не противитися. Мы же сих страдалец безвинных похвалами венчаем, глаголюще:

Радуйся, отче Павле, от юности Христу послуживый;

Радуйся, яко и умерети за Христа не отреклся еси.

Радуйся, отче Иоанне, веси Палехския украшение;

Радуйтеся, священницы Божии, яко молитвою себе предуготовлясте к преселению горнему.

Радуйся, Петре, храма Божия любителю, за негоже и пострадади изволил еси;

Радуйся, яко смерти горькия избыти лестию не восхотел еси.

Радуйтеся, Николае, Авксентие, Сергие и Анастасие дево, от безбожных избиеннии;

Радуйтеся, яко первомученицы земли нашея явистесея.

Радуйтеся, вси святии земли Ивановския, приснии о нас к Богу молитвенницы.

Кондак 5

Боготечныя звезды во тьме безбожия сущым явистесея, священнострадальцы святии, образ бо бысте верным словом и житием, любовью, духом, верою и чистотою, к мысленному солнцу правды Христу приводяще зовущих Ему: Аллилуиа.

Икос 5

Видевше пастырие церкви Христовы стадо свое расхищаемо от волка душегубителя, потщашася души своя положити за овцы, глаголом Божиим и молитвою на зверя льстиваго устремившася, и того до конца поправше, кровию своею в чертог небесный внидоша. Обаче не оставите сырых и нас, вопиющих:

Радуйся, отче Зосимо, града Иванова звездо пресветлая;

Радуйся, чина церковного и отеческих преданий ревнителю.

Радуйся, лжеучения и раскола обличителю дерзновенный;

Радуйся, священниче Божий и жертво Богу священная.

Радуйся, отче Григорие, подвижниче бодренный и молитвенниче неленостный;

Радуйся, нищих питателю и скорбящих утешителю благодатный.

Радуйся, во страну сибирскую изгнанный и тамо смертию осужденный;

Радуйся, свободою духа и светлостью души твоея мучителей удививый.

Радуйтесь, вси святии земли Ивановския, приснии о нас к Богу молитвенницы.

Кондак 6

Проповедует Церковь Российская узы и скорби ваша, святии, вы бо от ближних и чад разлучаеми, в темницах многажды затворяеми, оклеветаеми и гоними, работы тяжкими изнуряеми, многообразне умерщвляеми веры

ради, любви Христовы никакоже разлучитесь, присно поюще Ему: Аллилуиа.

Икос 6

Воссияша в Российскойстей земли, яко заря не вечерняго дне, страдальцы честнии, вами бо тьма безбожных злобы отгнася, и клятва за грех отступления от рода нашего ныне отъемлется, мы же ко свету богоразумия вами наставлени, сице глаголем:

Радуйся, Константине, кинешемския обители Успения пастырю усерднейший;

Радуйся, яко в туюжде обитель разоренную во узах приведен был еси.

Радуйся, прещений мучительских не убоявшийся;

Радуйся, мученическую кончину во изгнании восприемый.

Радуйся, Иоанне, в решемстем монастыри Богу послуживый;

Радуйся, яко злато в горниле страданий искушенно явивыйся.

Радуйтеся, Елисавето и Анно, на изгнание неправедно осужденнии;

Радуйтесь, мученицы терпеливодушнии и достославнии.

Радуйтесь, вси святии земли Ивановския, приснии о нас к Богу молитвенницы.

Кондак 7

Хотя человеколюбец Господь помиловати люди согрешившия, яви в российстей земли сонм исповедников новых, да тех призывающе в помощь, и в покаяния ризу облекшеса, благонадежне зовем: Аллилуиа.

Икос 7

Дивное чудо является всем, любовью вас призывающим, новомученицы святии, вы бо недужи от душ и телес отгоняете, скорбь и печаль потребляете, веру в маловерных сердцах утверждаете, мы же по Бозе на вас уповающе, сице взываем:

Радуйся, отче Леониде, от юности изволивый приметатися в дому Божиим;

Радуйся, от святаго патриарха рукоположение приемый.

Радуйся, яко за веру Христову седмижды в темницу заключен был еси;

Радуйся, едино слово во устех имевый: служу Богу моему дондеже есмь.

Радуйся, отче Феодоре, шуйских церквей благочинне и пастырю добронравный;

Радуйся, яко три дни и три ночи неправедно испытываемый, никакоже поколебался еси.

Радуйся, совесть пастырскую лжесвидетельством осквернити не преклонивыйся;

Радуйся, за верность Христу от мучителей зверонравных немилостивно убиенный.

Радуйтеся, вси святии земли Ивановския, приснии о нас к Богу молитвенницы.

Кондак 8

Странное слышание и видение неудобопостижное! Како кровию вашею, славнии, освятите землю Российскую! Како же мощи ваша, в земли сокровенныя, быша яко пшеница чистая в сеятву, тучный класс приплодившая всем хотящим жати спасение, Богу поющим о вас: Аллилуиа.

Икос 8

Весь ум и желание сердца к Богу вперивше, старец честных седмочисленных лик, от паствы и чад разлучени, во единый час судищу предсташа, обаче прещений мучительских не убоявшеся, вернии даже до смерти пребыша. Ихже пресветлую память достойно восхвалим, глаголюще:

Радуйтесь, Петре, Иакове и Иоанне, трием апостолом тезоименитии;

Радуйтесь, на Голгофу земную возшедшии и небеснаго Фавора достигшии.

Радуйся, Николае, словом Божиим паче хлеба чувственнаго в темнице препитавыйся;

Радуйся, за сие слово неправедно осужденный.

Радуйтесь, и друзии три Иоанна, благодати Божия исполненнии;

Радуйтесь, пастырие единомудреннии и единоправнии.

Радуйтесь, седины ваша мученическим венцем увенчавшии.

Радуйтесь, вси святии земли Ивановския, приснии о нас к Богу молитвенницы.

Кондак 9

Всякое естество ангельское удивися подвигом вашим, святии, како во плоти суще и в мире живуще, безплотнаго врага победили есте? Мы же таковыя ходатаи и помощницы в немощи нашей имуще, благодарно Богу поем: Аллилуиа.

Икос 9

Ветия многовещаннии и богомудрии многими песньми по достоянию вас восхвалиша, святии, мы же, аще и недостойнии и немудрии, обаче любовию понуждаеми, дерзаем сице вас величати:

Радуйся, отче Леонтие, от юности монашеское житие возлюбивый;

Радуйся, по вся дни о службе церковней поревновавый.

Радуйся, исповедниче, скорбьми многими веру запечатлевый;

Радуйся, старче и молитвенниче о людех богоприятный.

Радуйся, мати Арсение, Шуйския обители
Успения игумение преподобная;

Радуйся, смирение, любовь и молитву паче
всех добродетелей возлюбившая.

Радуйся, стаду твоему образ терпения в
скорбех показавшая;

Радуйся, от затвора темничнаго к небеси
возлетевшая и ангелы провождаемая.

Радуйтеся, вси святии земли Ивановския,
приснии о нас к Богу молитвенницы.

Кондак 10

Спаستися хотяй всем человеком
промыслитель Господь, мнозей греховней тьме
належащей, в мир посылает святыя своя, да тех
любовию согреваеми и верою озаряеми, уныния
хладность отринем и к деланию устремимся,
Христово имя всегда призывающе, поюще Ему:
Аллилуиа.

Икос 10

Царя превечнаго воини добропобеднии,
единый с нами имуще образ и естество, потоки
слезными пламень страстей угасили есте, и
всяку Христову заповедь верно сотворше,

достойно ныне приемлете славы венцы,
услышите убо и нас, вопиющих:

Радуйся, отче Стефане, веси Шустова
пастырю добрый;

Радуйся, от утра даже до вечера жития
твоего Богу волею поработавый.

Радуйся, яко в старости твоей инии ты
связаши и ведоши, аможе не хочещи;

Радуйся, в работе тяжце смерть приемый и с
лики мученик сочетавайся.

Радуйся, отче Евфимие, на служение Церкви
гонимей волею изшедый;

Радуйся, во храме пуге о людских гресех
моления и жертву приносивый.

Радуйся, священниче законный, яко данный
ти залог до конца непорочно соблюл еси;

Радуйся, яко Христа поругана и распята даже
до смерти не отвергся еси.

Радуйтеся, вси святии земли Ивановския,
приснии о нас к Богу молитвенницы.

Кондак 11

Пение всеумиленное примите от нас
недостойных, Сиона горняго граждане, вы бо

премудрость, богатство и славу мира сего
нивочтоже вменивше, юроди себе нарекосте,
сего ради избранныи, возлюбленнии и святии от
Бога нарекшеся, многу мзду восприяли есте,
поете со ангелы вечную песнь: Аллилуиа.

Икос 11

Светлоявленнаго дне зарю в своем сердце
имуще и богосветлый разум стяжавше,
блаженнии, прозреваете ясно грядущая и
тайная душ обличаете, к вечному свету всех
приводяще, усердно вам воспевающих:

Радуйся, Симоне, на реце Елнати начало
подвигу юродства положивый;

Радуйся, во граде Юрьевце претрудное житие
скончавый.

Радуйся, блаженне Алексие, Симону в
терпении поревновавый;

Радуйся, безбожных обличителю безмолвный
и страдальче кротчайший.

Радуйся, Киприане, при реце Уводи в дебри
уединенно подвизавыйся;

Радуйся, честныя твоя мощи многими чудесы
прославивый.

Радуйся, Максиме, странниче юроде, разум суетен блаженным безстрастием пременивый;

Радуйся, чистоты ради сердца твоего пророчества даром украшенный.

Радуйтесь, вси святии земли Ивановския, приснии о нас к Богу молитвенницы.

Кондак 12

Благодати Святаго Духа сосуди честнии, многия подвиги ваша кий язык от земных изречет? Мы же дивному во святых своих Богу присно поем: Аллилуиа.

Икос 12

Поюще подвиги ваша, святии, дивимся зело добродетелей светлости, устрашаемся оныя славы блистания, уязвляемся сладце любовью вашею и духом ревности исполняемся, да вам по силе последующе, и радости ваша общницы будем, зовущии:

Радуйтесь, святителие богомудрии, словом Божиим землю нашу озарившии;

Радуйтесь, священномученицы, проповедь Евангельскую кровию запечатлевшии.

Радуйтесь, мученицы всехвальнии, яко вами Церковь Христова утвердися;

Радуйтесь, исповедницы крепцыи, яко вами всякая лесьть низложися.

Радуйтесь, отцы преподобнии, яко истину глагол Божиих в житии своем показасте;

Радуйтесь, жены преблаженныя, яко в немощи плоти вашей Божию силу яviste.

Радуйтесь, Христа ради юродивии, чистым сердцем Бога узревшии;

Радуйтесь, праведнии, в мире яко светильницы просиявшии.

Радуйтесь, вси святии земли Ивановския, приснии о нас к Богу молитвенницы.

Кондак 13

О святии сродницы наши, многообразне угодившии Богу, недостойная моления наша приемше, милостиваго Бога молитве, из глубины греховныя ны воздвигнути и вечных мук свободити о вас вопиющих: Аллилуиа.

Этот кондак читается трижды, затем икос 1-й: «Ангелом соревнителие...» и кондак 1-й: «Избраннии от Бога святии...»

Молитва

О прехвальныи угодницы Божии, святии вси в земли Ивановстей просиявшии и яко цветы богосажденнии землю нашу облагоухавшии, многая ваша имена и большая дарования, вашим бо непорочным житием от древних родов до ныне свет Христов просвещается и имя Божие прославляется. Мы же, недостойная чада ваша, последних веков дошедше и исполнение чаемых вами видеюще: веры православныя возрождение, храмов и обителей обновление, святых угодников прославление, поем Отца, Сына и Святаго Духа Бога, и к вам, избранным Его, со умилением и верою припадающе молим: не оставите Отечества вашего земнаго, молити всеблагаго Господа даровати нам покаяние всецелое и сердце люботрудное во взыскание Его, заблуждшыя и безчувственныя светом веры озарити и на путь правый наставить, властей предержащих сердца просветити, еже от церкви благая глаголати, нищыя и сироты препитати, плененныя от уз свободити и во Отечество возвратити, вся во обстоянии и скорби сущыя скоро избавити, и всякую душу людей своих благодатию Духа Святаго во благое наставить, да тем призываемы, очищаемы и просвещаемы,

Царствия Небеснаго с вами сподобимся и прославим в Троице славимаго Бога во веки веков. Аминь.

